

## BROP GUITS NE PXEEL PABL LO

# ZHA CORINT

---

**1** ¡Diuzh to grēse to!

Naa nac Pabl, grop no bets ne Timoté, laa no rquia stib guits rii rxeel no guiedz Corinth i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grēse to ne nac to zha ne ngab xnēz Dios; zigtaa tow, zigtaa grēragaa zha ne no dib nēz Gres iw.

<sup>2</sup>Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

<sup>3</sup>Bets, bzian, golgotsaa gwi ne ganle, jzha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne <sup>4</sup>lo grētaa guielnē ne rdieed ne. Ni laa me rchoobladz zdoo ne gon, zeena scagaa grēraa zha ne rdzian ne no guielnē, mban rac zho, guio ne guiochoobladz ne zdoo zho zigne rchoobladzaque me zdoo ne.

<sup>5</sup>Zig nac niina, nroob guielnē ne nodieed no loxaque ne rililadz no Jesús, per scaquegaa ib rsaand me no tibaque nochoobladz me zdoo no. <sup>6-7</sup>Laa no nodzian grē guielnē rii, sacne noxco no nonee no lo miech zha laa zho lo dol, parne scagaa grielo cchoobladz no zdoo to. Lo grē guielnē rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grē guielnē ne nodzian no nu niina. Ni me gon nac men ne gacniñ to glēb to gan tow.

<sup>8</sup>Bets, bzian, tel niaca miñe nian to ganle zha nactaa grē guielnē nroob ne bdieed no zeene no no nēz Asia. Ne nligaa nroob psacsi zho no, ncuaañe lēbdraa no lo grē guielnē co, tibaque rdzieets no bod gataa niet no. <sup>9</sup>Masaque bzhaac no len dze co zig rzac tib zha ne nole guet, laa zho quiambēzse gal hor ne guet zho. Garaa bdziñ no peet grielod dziuñ no ne nose, sinque Dios none gnalo no, mese zac csilaa no lo grētaa guielnē; sac tel me, haxta mengut rbeeban me.

<sup>10</sup>Ni nligaa blee me no lo guielnē co, bla me no lo guielgut co; ni ndion no scaque zla me no lo grēraa guielxtseeb ne dzian no, <sup>11</sup>totsaque gacniñ to no tibaque gnab to lo me gacniñ me no. Zeena, tibaque gac ne grēse ne gdeed ne xquizh lo me.

<sup>12</sup>Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque ne nquialadz Dios no gane quaiyacniën me no znu mban no. <sup>13</sup>Grë mine rnee no lo guits ne zixeel no lo to, niapse diidzliw, ni mine rgobey no grielo guien to min co rquiaa no; gane racladz naa gdziñ dze ne guien tow. <sup>14</sup>Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

<sup>15-16</sup>Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialteedaque naa lo to i stib; zeena niac chop vuelt ne nionley zdoo to. Lozh ga, ine niowse nzonëz to naa nia naa nëz Judé. <sup>17</sup>Ni pasëë naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nanpaa zho gund zhow. <sup>18</sup>Dios zobwi ganle rdziuuñscad no. Mine rnee no, rdziuuñ now.

<sup>19</sup>Golgan ganle, zigtaa naaw, zigtaa Silvana, zigtagaa Timotéw, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse mine rnee me run mew, <sup>20</sup>ni grëse mine psan Dios diidz gun me, grësew noyun mew; gane niicle nogaaw rnee no lo miech ganle ible run me mine rnee me, ga rlu ganle pa lotaa men nroob nac me. <sup>21</sup>Ni lëë Dios co gon nozhixcuaa lo xquielmban ne, laa ne ngab xnëz Jesús niina; me bzooblo no nonee no Xtiidz me. <sup>22</sup>Haxta pxeel me Espiritu Sant zdoo ne, rrieequia bloobey me ne ga, par glu ganle lo me ngab ne, ni ible zgaa ne grëtaa guielnzaac ne bneele me gneedz me lo ne.

<sup>23</sup>Me zobwi, me nan ganle pe nacne gard guial naa. Gard gon guial naa, per por tow; sac rquia zdoo naa to, racladzd naa loxaque guialquiago naa to i, lozh ga mban gac to. <sup>24</sup>Guiabde to sca togo bod racladzd no guiaad no. Nli rquiindraa to guidnee no lo to zha gliladz to Dios, sac dib zdoole to rililadz to me; per laa no racladz ine guiaadlonley no zdoo to i. Golguien sca, min co racladz no, racladzd no guiaadloguielnë no to.

**2** Min co nagon bend naa ne nial naa, <sup>2</sup>sac nonguielda ga coguielnë naa to, ni to nac zha ne rgonley zdoo naa. <sup>3</sup>Ne racladzdaxe naa min co waa, gane pxel naa tib guits co lo to glo, zeena nzhixcuaale lo guielto ne nobee to i, zeene laa naa nlanso. Sac tel lega nlansose naa, laa ne ndzio ne guielbley, lel guielnë ndzio ne. Ni nan to ganle, tipse nac guielbley ne rdziaap ne; ñniacxe zrieelo nley gac to telne ran to mban rac naa?

<sup>4</sup>Tel gan to ganle zeene pxel naa guits co, ñne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguielnë naa to; sinque laaw pxel naa, zeena xixcuaaniob lo ncuane ndzinlid ne noyac i; ni laa naa ben min co sacne rquia zdoo naa to. <sup>5</sup>Zeene bin naa zha nac dol ne noyun zha co i, zig rne naa ga: bio naa guielnë; per rien naa mazdraa nroob bio to guielnë. <sup>6</sup>Nana gon, ne squi laa to pteedle zho tib caxtigw, ñlëëlew ga na! <sup>7</sup>Golguiaanladz mine been zho ga,

golneewen lo zho stib, golchoobladz zdoos zho zeena gacmband zho. Sac telne csaanladz to zho, nend scase lozh guuu zho lo xquielnë zho. <sup>8</sup>Rnab naa lo to, golleynie zho stib, zigne rleyneque to zho glo.

<sup>9</sup>Ni stiba, laa naa pxel guits co lo to, zeena dien pe zon to diidz gun to mine rne naa lo to ga. <sup>10</sup>Golguiaaamladz mine been zha co sca, tel naa laa naa biaanladzlew. Jesús zobwi ganle laa naa benle zho perdon, zeena gbiire zaacse gac to; <sup>11</sup>ni scagaa gleyd mendox gungüet ma ne. Led nanle to ganle, zombëzle ma dien zha gnitnëz ma ne.

### Tibaque noxco Pabl cseed miech Xtiidz Dios

<sup>12</sup>Bded ga nagon dzigo bia naa guiedz Troas. Zeene bdzin naa ga, ne nligaa bneedz Dios diidz niun naa xtsiin me ga. <sup>13</sup>Nac diidz ga ndzieelo naa bets ne Tit, per zeene gon naa bdzind me, biotiblidraa guic naa. Nacne brique naa ga bia naa nëz xtan zha Macedon, biaguib naa me.

<sup>14</sup>Per, xquizh xquielnzaac Dios! Sac zaatne ziotaa no, Jesús ner lo no, me rlu ganle rdziun no gan lo grëtaa ncuane rca. Tibaque rnee no lo miech gacnan zho ganle cho nac me, sca quiaxobnen no Xtiidz me, zig rzëbxlaa tib ncuane nex rlaa.

<sup>15</sup>Haxta no, masaque nac no lo Dios zig tib ncuane sca nex rlaa; sca nac no lo me sacne laa no ngable lo Jesús. Nëzrii nëzrec nex zëbxlaa gox co, zigtaa lo grë zha ne ngable xnëz Dios, zigtagaa lo grë zha ne zie nëz ne nitlow. <sup>16</sup>Par grë zha ne nole nëz ne nitlo, masaque rzac zho no zig tib gox ne nguid rlaa, haxta rsoladz zho pe nac guielgut ne quiambëz zho; sangue grë zha ne nole xnëz Dios, rzac zho no zig tib gox nex ne runcsoladz zho guielmban ndzon ne no ygaa zho.

¶Ni led chold zha ne gon grieelo gun dziin rii! <sup>17</sup>Nu rqiin zha ne dib zdoos rquiabladz gun dziin lo Dios, glu zho ne nli Dios pxeel zho, ne nli Jesús nacnie zho. Sac no zha ne, loxaque rquiaalo zho ye zho rseed miech Xtiidz Dios, per laa zho runa par cuee zho dimi.

**3** Nana ne znu rne naa, guiab to bod yeque no rdziun zig run zha ne sca rquidie ga, lëëque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziunnon no no, niicle peet diidz rquiindgaa no. <sup>2</sup>Led yed no rqiin pe diidz ne dzeey no, to rlu cho nac no. Grëse miech ne gan zha notsëë Dios lo xquielmban to, gase gunbey zho no, ga glu pe nac dziin ne rdziun no. <sup>3</sup>Gane rrieequia nac to zig tib diidz ne quialu ganle cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguiamban. Ni pquiindgaa me pe lo guits ne nquiaa mew, sinque laa me pquiaaw zdoos to.

<sup>4</sup>Ni ndionpaa no nli scaw, sac Dios zhal rluw, ne nac no zha ne ngab lo Jesús. <sup>5</sup>Per guiabd ne togo nose rrieelo rdziun grë mine rdziun no, led scada, Dios nac men ne racniën no rdziun now; <sup>6</sup>sac me bdixbiini no zha cseed no miech diidz cub ne psan me. Gane laa no noseed miech niina, per rseete no

zho tsienal zho miñe rnabey ley, sinque laa no noseed zho guien zho tsienal zho miñe rnabey Espíritu Sant. Sac tel leya, lëë gdib rnabeya guet grëse miech ngoopdol; sangue Espíritu Sant, laa me rlu zha yгаа zho tib guielmban ndzon.

<sup>7</sup>Gołsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grë zha ngoopdol. Biinidoo ne biaan lo Moisés dze co, haxta lëbd lo zha Israel gwi zho lo me, per dzega dzega biuu biini co.

<sup>8</sup>Scaque nagon nolu Dios xquielndzon me, niina ne laa Espíritu Sant nolu zha yгаа miech guielmban; per, mazdraa gon nroob nac guielndzon ri! <sup>9</sup>Sac gon, tel scataa blu xquielndzon Dios zeene biaan guet grë zha ngoopdol; mazdraa dzigo nroob nac guielndzon ne rlu niina. <sup>10</sup>Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. <sup>11</sup>Ni stiba, bza dze ne been ley co dziin; sangue xtiidz cub me, gdziñd dze ne gdzëew. Gacxe waa, mazdraa nac biini ne ziaadniew.

<sup>12</sup>Ni ne ndionaxe no waa gdziñd dze ne gdzëew, gane tiblque laa no noneew lo miech; <sup>13</sup>rdziuund no zig been Moisés. Sac tel Moisés, pqiua tib lë lar lo me, dzigo gond zha Israel zha bnitlo biini ne biaan lo me ga. <sup>14</sup>Ni rriequia ye lo grë zha Israel ga sca bdze, gacxe waa, haxta lo nadze riend zho zha zhobnee lo Xtiidz Dios, miñe psan me padzeela. Ible riend zho ne bdedle dze ne pqiuiin diidz gol co, Jesúsle none gliladz zho niina. Me nac men ne cxal lo zho. <sup>15</sup>Ne nligaa sca nac zho, haxta lo nadze niicle rlabraa zho lo guits ne pqiua Moisés ga, tibaque ndip nac zdoo zho.

<sup>16</sup>Per tel zha ne csaan grë guielntseeb, dib zdoo zho guien zho cho nac Jesús, ible zlit me lar co lo zho; <sup>17</sup>sac gon, miech ne naciele zhiEspíritu me, led yedraa zho ngadoo lo ley gol co. Ni ndion ne ganle, meque ga nac Espíritu. <sup>18</sup>Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspíritu me lo xquielmban ne, zigse zie dze noluraa me zha nactaa guielndzon ne rap me.

**4** Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin ri.

<sup>2</sup>Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuane nacdraa Xtiidz me. Me zobwi ganle niapse diidzli rnee no, niicle grëgaa zha ne rdziuunbey no, nan zho rquidieed no.

<sup>3</sup>No grë zha ne ib nëd tsoguic zha nac zhiwseed Dios miñe nonee no; sac lëëque grë xtol zho notse lo zho, laa zho zie nëz ne nitlo zho. <sup>4</sup>Nëd zho gliladz zhow, sac ible mendox (ma ne nonabey lo guidzliu ri) noyun ncow xquielrien zho; gane riend zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

<sup>5</sup>Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me. <sup>6</sup>Ne nligaa tib ngundziin winse nac no! Gołwi ganle Dioszal, men ne bnabey

biaan biini ne rziini guidzliu, me bdixbiini guic no bien no xquielndzon me ga biaadlu Jesús.

### Rsaand Dios zha ne dib zdoo rnalo me

<sup>7</sup>Ne nlipaa, lega nacse no zig nac tib guies yu ne notsow grëtaa ncuaaane ndzon ne zieneedz Dios lo no. Gase na ganle rlu, Dios naccheña grësew, peet nond no loxaque nose.

<sup>8</sup>Me nacie no, niicle roob zhgab ne rio no, per racmband no; niicle roob nac guielxtseeb ne rdzian no, per choot rdziebd. <sup>9</sup>Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib. <sup>10</sup>Zaatne ziotaa no, quianał miech gut zho no, zigne beënaque zho Jesús; per me rsilaa no ladznia zho. Ga rlu ganle ne men mban nac me, ni me nacie no. <sup>11</sup>Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacie me no, niicle ne tib lëse beñ nac no.

<sup>12</sup>Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to. <sup>13</sup>Niicle nagon ne znutaa noxtseeb no, per ndionpaa no me quianap no, gane rdziebd no noseed no miech Xtiidz me; zig zhobneeque lo Xtiidz me, zaatne rnee: “Bliladz naa mine rnee me, gane rne naaw.” <sup>14</sup>Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdziñnie Jesús ne lo me.

<sup>15</sup>Grëse guielnë ne nodzian no, laaw nodzian no sacne nligaa noxco no to; zeena grëse to sëëb xnëz me. Sac telne ndal grë zha ne sëëb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me. <sup>16</sup>Mincoxe waa, ib choot riablod. Nli zigse zie dze laa no bii noyoxraa, sangue zhiespíritu no, zigse zie dze laaw racnubraa, laaw riaanmberaa nëz lo Dios.

<sup>17</sup>Ni stiba, niicle ne znutaa nodzian no grë guielnë rii, per ncuaaane tib rded naca, led ncuaaane rnada; sac gon, zeene laa no lozh dieed grë min rii, mazdraa roob nac lo guielndzon ne ygaa no, ni mincosi gdziñdraa dze lozha. <sup>18</sup>Gacxe waa, choot rdziuuncasd grë ncuaaane quiazian no lo guidzliu rii, sinque laa guic no nonie ygaa no grëtaa guielbley ne no bgaa. Sac grë ncuaaane ran ne niina, ncuaaane tib rded naca; sangue grë ncuaaane gard dzian ne ga, led yedraa min co nitlo.

**5** Ni ndion ne ganle, zeene laa xcuerp rii ne nitlo, laa Dios gneedz stib mine gdziñdraa dze nitlo. Masaque nacse xcuerp rii ne zig nac tib yu guizh win ne rbëz miech lo wгаа; sangue cuerp ne gneedz me lo ne, rrieequia naca zig tib yu ne gbiaazpaa ne bgaa. <sup>2</sup>Blactaa guielnë ne rdieed ne niina ne rdziaap ne cuerp rii! Gacxe waa, quiambiaaznë ne gdziñ dze ne gneedz me stib cuerp co. <sup>3</sup>Sac gon, led niapdse espíritu gdziñ ga, sinque none gapa cuerp.

<sup>4</sup>Ne nligaa, niina ne mbannie ne cuerp rii, zeene në nodieed ne, rziac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie

cuerp co, zig nacse ne niina ygaa ne guielmban ndzon co. Sca rziaac ne, sac choot rdziladz guet. <sup>5</sup>Dioszhal bzo ne ygaa ne min co, ni ible zaca, sac gon laa me pxeelle Espiritu Sant nacie ne.

<sup>6</sup>Tel no, min co nagon quiambiaaz no; ndionle no laga mbannie no cuerp rii, grielod ygaa no min co, grielod gdziin no zaatne no Jesús. <sup>7</sup>Nli rdziand now niina, per dib zdoo no riladz no ib laaw none gac. <sup>8</sup>Gacxe waa, haxta nley rac zdoo no quiambiaaz no gdziin dze co; rziaac no tebaa laa no brieel leñ cuerp rii, zeena guiobannie no Jesús. <sup>9</sup>Min co nagon, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziin no lo mew. <sup>10</sup>Sac gon, grëse ne zdziin dze ne laa ne gacredz lo me zaatne gun me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga ygaa ne mine guioquia ne tib tib ne.

<sup>11</sup>Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziun no dziin rii, ni racladz naa guien to ganle sca nac no.

### Zaacse golgac lo Dios

<sup>12</sup>Grë mine blozh bne naa nu, zig bnele naa ga: nacda par dziuunnon no no. Laa no rnee grë min rii, zeena guienpaa to ganle cho nac no; ni scagaa, guien to zha ctsire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho. <sup>13</sup>Nligaa, dib zdoo no noxco no xtsiin Dios, laa miech masaque rzac zho riotsle guic no. Nana niicle tel riotsgaaw, per xtsiin Dios nodziun no. Sangue no, ndionpaa no riotsd guic no; laa no rdziun grë min rii, sacne noxco no cseed to Xtiidz me. <sup>14</sup>Laa no nodziun dziin rii, sacne rleynie no Jesús, maase tel zhataa rzac miecha.

Ndionpaa no Jesús bgaa guielgut ne niogua ne; scaquegaa, ndion no niina ne laa no bziaab xnëz me, rrieequia gutle no lo grëta ncuane ndzinlid ne bdziun no glo. <sup>15</sup>Gacxe nagon waa, grëse zha ne rzëeb xnëz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdiizh me xtol zho (ni brieeban me), par ygaa zho tib guielmban ndzon ne gdziind dze lozh.

<sup>16</sup>Gotsaa guien sca, zha ne nole xnëz Dios, ziaacd ne zho zig rzac grëraa miech zho, rzac zho peet nond zho. Tel naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me.

<sup>17</sup>Sac gon, grëse zha ne ne nlipaa dib zdoo riladz Jesús, stible miech nac zho. Grëse tel zha goc zho glo, laa min co bdedle. ¡Ncube nac lo xquielmban zho! <sup>18</sup>Ni loxaque Diosse gon zrieelo sca gunncub miech, sac gon, me pxeel Xpëed me Jesús biaadtizh grëse xtol ne, laa ne biaanwen lo me. Ni scagaa niina, me bzo no znu quiaseed no miech, zeena gacnan zho zha grielo guiaanwen zho lo me.

<sup>19</sup>Laa Dios nodeed diidz niina guiaanwen miech lo me, gunquizhd me zho tel pe nactaa xtol zho, totsaque gliladz zho cho nac Jesús. Min rii nagon bzo

me no nonee no lo miech. <sup>20</sup>Golgan sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rriequia gon Dioszhal rso diidz rii lo to. <sup>21</sup>Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

**6** Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon mine nonee me lo to niina. <sup>2</sup>Lo Xtiidz me, no tib zaatne znu zhubnee:

Lëetse len dze ne nosilaa naa miech, laa to bnab gacnie naa to.

Lëetse len dze ne rdeeda diidz gac mine quiambëz to, laa grë xliaadz to blanso lo naa.

¡Ni lëe dze co nu nagon bdzin! ¡Nadzegazh quiambëz me gbig miech lo me, zeena csilaa me zho!

<sup>3</sup>Dziin rii quiadziuun no, choot quiadziuunctald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios. <sup>4</sup>Zigtaa ncuaaane rdziuun now, zigtaa grëgaa ncuaaane nodieed now, rlu no ganle ne nli xtsiin me nodziuun no. Tel pe nactaa grë guielnë ne nodieed no, tel pe nactaa grë xliaadz no, niicle no zaatne rsacsi miech no, per choot rietede. <sup>5</sup>Blactaa zaatne rguin zho no, zaatne rsioogyu zho no, zaatne rrie zho ndal zho racntseeb zho lo no. Blactaa rdib rdzaag no rdziuun no dziin, no zaatne rrie zhimcaalo no dipse guieel, no zaatne retgbin no.

<sup>6</sup>Ne nligaa rdzioxco no ndzinli mban no, choot rietede, wen wen rdziuunbey no zha nac Xtiidz Dios, sca ran miech ganle ne nli Dios pxeel no. Dib zdoo no rleyne no samiech no, wen rac no lo zho, zilu no ganle pa lotaa racnie Espíritu Sant no.

<sup>7</sup>Niapse mine nac diidzli min co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuun no dziin. <sup>8</sup>Choot rsaand mine pso Dios no nodziuun no, maase niicle mine runtaa miech no. No zaatne runnon zho no, nogaa zaatne rzhidznie zho no; no zaatne rneenë zho no, nogaa zaatne rleyne zho no. Niicle ne diidzli rnee no, per no zho rzac noquidiee no miech. <sup>9</sup>Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. <sup>10</sup>Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grë guielnzaac ne rgaa miech zeene rnee no lo zho. Rdziaapd no grë ncuaaane rap grëraa miech, per ncuaaane rdziaap no, nroob nona.

<sup>11</sup>Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleyne no to. <sup>12</sup>Telne rzac to gard gacpaa ne tipse, per led nod naca. Tel no rleyne no to, sinque to gon rien no laglaase

rleynie to no. <sup>13</sup>Ne nligaa peet rqueets naa lo to, laa naa rne lo to zig rnee tib dad lo mëəd. ¡Scaquegaa to, golsiguiell zaacse golgac!

### Zhaa nac biini lo guiellcow

<sup>14</sup>Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guiellcow. <sup>15</sup>Sac gon, tel Jesús, çniacxe tipse nac me grë me mendox? Scaquegaa grë zha ne nole xnëz mew, grieelod tipse gac zho grë zho zha ne no lo dol. <sup>16</sup>Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, ine sënne naa to.

Naa gliladz to, ni scagaa to, lo naa ygab to.

<sup>17</sup>Gacxe waa, rbiire me rnee me:

¡Golriee lad grë zha qui, golbiche lo zho!

Gunde to grë ncuaane ndzinlid ne runn zho, golbig lo naa, naa ycaania to.

<sup>18</sup>Naa gac Pxoz to grëse to, scagaa to, laa to gac xpëəd naa.

Lëe xtiidz men ne rnabey to nu.

**7** Bets, bzian, gotsaa gwi ne ganle zha nactaa ncuaane psan Dios diidz ygaa ne. Gacxe waa, golgotsaa lozh griee ne lo grë zhgab yozh, lo grë ncuaane ndzinlid ne runlctal xtol ne. None zigse zie dze dzioxcoraa ne gban ne zigne rdziladz me.

<sup>2</sup>Ne nligaa, zaacse golgac gollcaania no stib. Tel pe guielnë ne noded to, tel zha rzac to, to bguiba; zig nac no, choot noquidiede to, choot nosacside to.

<sup>3</sup>Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to. <sup>4</sup>Laa naa rne grë min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë mine nodeed naa, ine riaad tib guiellbley zdoo naa; haxta riats naa ne runbey naa to.

<sup>5</sup>Wlal ne blanso no Macedon nu, ni tib lë notiblid guic no; lala noxtseeb no lo grë zha ne quianal no, lala nonieque to guic no dien yo to. <sup>6</sup>Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu, <sup>7</sup>blansonie me diidz zaacse pcaania to me. Per nli rley no bdzion ndzinlile mban to, në me bio to guielnë grë len dze ne bded ga, ni në me nonie no guic to, quiambëz to tebaa zha ganniob to lo no stib.

<sup>8</sup>Zeene pxel naa guits co lo to glo, mban goc zdoo naa sac bien naa ib zgoguelnëw to, sangue niina racmbandraa zdoo naa; sac rien naa niicle ne bio to guielnë tib bla dze, per na laa ncuaan co bdedle. <sup>9</sup>Gacxe waa rley naa niina, per guiabde to togo rley naa bio to guielnë, sinque rley naa gon naa laa to wbiire wbig lo Dios por guielnë ne bio to ga. Ni sca nagon racladz Dios



gun grè zha ne ngab xnèz me zeene runctal zho xtol zho, gane rienpaa naa led psacsid no to ga.

<sup>10</sup>Zeene Dios rdeed diidz sca rio miech guielnè, lo guielnè co laa zho rbig lo me rsanmbe me zho lo xtol zho; rsaan zho tel pe nac ncuane ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guielnè co. Laa grèraa guielnè ne ran miech, zig nac zha ne nod xnèz Dios, loxaque rlozh runmbana zho, laa zho bii zie nèz ne nitlo zho.

<sup>11</sup>Golgan ganle, pa lotaa bzhixcuaa to niina ne bio to guielnè co. Haxta baa to biini, bioxco to blee to zha co lo dol ne quiayun zho ga; bien to ganle nonguie la rlisqui naaw. Gacxe waa, zeene gon to pa lotaa nac dol co, güeyniew guic to ni wbinladz to; gondzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquish to zho mine been zho ga. Wen ne sca been to, ga blu to ganle rdziguiende to dol ne been zho.

<sup>12</sup>Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoz zho; sinque laa no pxeela sac tibaque noxco no zaacse gac to. <sup>13</sup>Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grèse to zaacse blèzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina. <sup>14</sup>Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to. <sup>15</sup>Rleynie me to, rzac zdoo me zeene rsoladz me grèse to ndooladz goc to pcaania to me, ni bin to diidz been to mine bnabey me to. <sup>16</sup>Ne nligaa, rley naa niina bin naa squi zaacse rac to! NiNasi, nannpaa naa racnie to naa zigne racnie naa to!

### Dib zdoo to goldeed gon

**8** Bets, bzian, laa no gzodiidz lo to ganle pa lotaa quiayacniën Dios grè zha ne ngab lo Jesús nèz Macedon nu. <sup>2</sup>Nli nroob grè guielnè ne quiayan zho, per nguieel rac zho.

Len dze ne bded nu beenlo zho tib gon, niicle ne zhis ncuane rap zho, per nroob gon ne beenlo zho. <sup>3</sup>Laa naa rnew lo to, sac naazhal gona. Ne nligaa, dib zdoo zho bleeladz zho grè ncuane bloogon zho; ncuane rgaataa lo zho laa zho bdeeda. <sup>4</sup>Dzigo bnab zho lo no gdeed no diidz ye xgon zho guey lo grè zha ne nacgrè ne, zha ne guieend pe yquiin. <sup>5</sup>Ni lèdsew ga, bzee zdoo no zeene bdzion no blozhse psan zho zho lадznia Dios, laa zho wbig lo no nè zho, mine csiaabtaa Dios guic no gnabey no zho, zun zhow. Ni lalnu gon güeynied guic no gun zho grètaa min rii.

<sup>6</sup>Niina ne bdzion no znutaa biabgan zho nèz rii noyunlo zho gon rii, nacne rdzieets no lo Tit siguieel me guiaad me nèz lo to i stib; zeena lozh gunlo to gon ne bnabeyle me to i quiayunlo to. <sup>7</sup>Rdziunbey no to: dib zdoo to rnalo to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoo to goltsoxco golgunlow.

<sup>8</sup>Laa naa bzet lo to nu zha been zha Macedon, per guiabde to bod nonabey naa to scapaa gun to. Sinque laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grëraa zha ne nacgrë ne, led loxaque diidzdsew. <sup>9</sup>Golwi ganle, zig nac Jesús pa lotaa noxco me ne. Niicle ne me nacchen grëtaa ncuaañe no, per bdeed me diidz goc me zig tib zha ne peet rapd; ga bgaa ne grëtaa guielnzaac ne rap me. Laa me been min co sacne rleynie me ne.

<sup>10</sup>Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdib iz ga, ine nguieel rac to psilo to. <sup>11</sup>Nana sca, zigne psilo to hor co, scaquegaa niina nguieel golgac golsiaal lo dziin co. Golquiabladz tel palaltaa ncuaañe rgaa lo to tib tib to, dib zdoo to goldeeda; <sup>12</sup>sac zeene dib zdoo miech rquiabladz zho cogon zho, tel palaltaa mine ygaa lo zho, scaania Diosa. Nanle me palal ncuaañe rgaa lo tib tib miech, gnabd me ncuaañe ni quianied zho.

<sup>13</sup>Sac nacda ne ygad to grëse ncuaañe rap to lo stib zho, lozh ga guiaanmban to; laa zha yquianie grësew. <sup>14</sup>Led scada. Laa min rii rac, zeena grëse ne lalga ncuaañe yquianie ne. Niina ne rgaaw lo to, goldeed palala yquiin grë zha ne rapd nrooba; zdzingaa dze na pe gunfalt lo to, dzigo laa zho gneedz tel pe nacgaa ncuaañe quianiede to. Sca none dziuunlsa ne xyudar zha ne nacgrë ne, zeena zig rne naa ga: lalga ncuaañe yquianie ne. <sup>15</sup>Golsoladz ganle, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

#### Laa Tit guiaad i stib

<sup>16</sup>Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. <sup>17</sup>Zeene bnaab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib.

<sup>18</sup>Nëz rii, no tib bets ne, nroob yudar quiaayun me nogaaz Xtiidz Dios lo miech; zaatne rcaalsataa zha ne no xnëz Dios nu, grëse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i; <sup>19</sup>ni meque bzooblo zho, sënäl zhits no zeene guiosan no gon rii. Nozhal guiosana, sac ne nligaa dib zdoo no noxco no zha gac xyudar grë zha ne guiend pe yquiin. Nu rlu ganle pa lotaa men nroob nac Dios, sac me quiaayacniën ne ne laa dziin rii noyac.

<sup>20</sup>Gza no bets co guio, zeena gzadold zdoo miech guiab zho nend zha lega zhiëen no palal gon rii, sac gon nligaa nroob naca. <sup>21</sup>Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacne sca guio no gza no.

<sup>22</sup>Rdziuunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrë ne.

<sup>23</sup>Teḷ nand new cho gnabdiidz lo to diēn cho nac Tit, goḷguiab lo zho tipse nac no grop no me, xyudar naa noyūn me quiaseed no to. Ni teḷ gnabdiidz zho cho nac schop zha ne ziaadnaḷ zhits me i, dzigo goḷguiab grē zha ne ne no nēz rii pxeel zho, dib zdoo zho noxco zho mban zho zigne rdziladz Dios.

<sup>24</sup>Goḷguien sca, gza zho zigne ziaad zho lo to i, niowse goḷcuēzlo zho. Goḷlu ganḷe ne nli dib zdoo to rleynie to zho, zigne rleynieque to naa; zeēna gacnan grēraa zha ne nacgrē ne nli miṇe rnee no zeēne rzodiidz no lo zho zha nac to.

**9** Nanḷe naa, rquiindpaa gni naa lo to zha gdeed to gon ne gaclo nu gac xyudar grēraa zha ne nacgrē ne, sac laa to noyūnlolew. <sup>2</sup>Runbey naa to, nanḷe naa ible rquiabladz to guṇ to xyudar zho, gacxe waa rley naa rzodiidz naa lo zha ne no nēz Macedon nu, rne naa lo zho: wdib izlaa psilo to nēz Acay i quiaayūnlo to gon co. Miṇcocxe waa, zeēne bin zhow, nzian zho pquiabladz laa zho bdeeda. <sup>3</sup>Per laa no rxeel gza bets rii ziaad i, ziaadgunḷsoladz zho to lozh guṇlo niob tow; zeēna glu ganḷe led lega rneed no zha nac to.

<sup>4</sup>Sac gonḷ guieḷto ga grieequia naa lo zha rii, teḷ guiaḷnie naa bla zho i, ni gan zho peet gard gaclo. Nli ziaaṇ naa guieḷto, per mazdraa gon nac guieḷto ne guiaaṇ to. <sup>5</sup>Min co nagon, ni naa mazd cxel naa zha rii, ziaadnerga zho zeēna guṇ zho xyudar to lozh ycaalsa gon ne pquiabladz to guṇlo to ga.

Laa naa rnab lo to, teḷ pe nac ncuaane cogon to, dib zdoo to goldeeda. Goḷguien zha cogon to. <sup>6</sup>Goḷwi ganḷe zha nac guieḷgon: Zha ne zhis ran, zhis guieḷnzaac ne rcaa zho; sangue zha ne nroob ran, scagaa nroob guieḷnzaac ne rliis zho. <sup>7</sup>Tib tib to sca, goḷcobey palal ncuaane gdeed to. Miṇe gdeedtaa to, dib zdoo to goldeeda; ib guṇde to ne guiab to por rac-wnabsew laa to gdeeda. Sac gon, zha ne dib zdoo rdeed ncuaane rgogon zho, rleynie Dios zho. <sup>8</sup>Ni me ne nac me men ne rrieelo rneedz grēse ncuaane rquiin, me nac men ne gneedz grētaa ncuaane yquiin to; ni haxta ziaaṇ miṇe gdeed to gac xyudar grēraa zha ne nacgrē ne. <sup>9</sup>Zigne raquietaque lo Xtiidz me, zaatne rnee:

Zha ne nguzobdiidz lo Dios,

dib zdoo zho rgad zho ncuaane rap zho lo grē zha ne guieṇd pe yquiin;

ni scagaa sēēb diidz ne miech wen nac zho.

<sup>10</sup>Dios guṇlay ncuaane quianie to, ygaaw gdeed to, ni scagaa me gacnieṇ to nroobraa guieḷnzaac ne yгаа to. Goḷwi ganḷe, zha runlay me zha ne ran: Me psan grēse lo bni ne ran zho, ni meque rchooba; rlozh ga, nroob guieḷnzaac ne rliis zho, rgaaw row zho.

<sup>11</sup>Ne nligaa, Dios nac men ne gunnroob ncuaane quianie to, zeēna scagaa nrooba cogon to. Goḷguien ganḷe, zeēne laa no guiosana lo grē zha ne yquiina ga, blactaa gley zho gdeed zho xquizh lo Dios. <sup>12</sup>Led lega nacdse gon ne gdeed to i. Sac gon, led loxaque xyudardse zho guṇa, sinque zeēne laa zho ycaaniaw, haxta squiabladz zho dib zdoo zho gdeed zho xquizh lo Dios. <sup>13</sup>Zley zho gan zho grētaa ncuaane cxeel to yquiin zho; ni zleynie zho Dios gan zho ron to miṇe rnabey Xtiidz Jesús. <sup>14</sup>Haxta dib zdoo zho gnab zho gacnieṇ Dios to, por grētaa guieḷnzaac ne gdeed me ga yгаа zho.

<sup>15</sup>¡Xquizh xquieInzaac Dios, sac gon tel me nroobraa nac guieInzaac ne bneedz me lo ne! ¡Gotsaa gwi ne ganle, haxta Xpëed me bleeladz me!

### Rieguial gnabey Pabl lo zha Corint

**10** Ziyon naa rnee zho i, zeene zose naa zit nguieex rzë xtidz naa rxel naa; laa zeene zo naa lo to, rdzield naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig gun Jesús, tel niaca mine mezhal gnee lo to. <sup>2</sup>¡Tebaa gdzind dze pe yquiaaqui glu naa xquieldox naa lo to! Zha ne squi rzac lalaque nac no grë no grëraa miech, rnee zho mine run miech, mincoque rdziuun no, ¡tebaa siguiel zho zaacse gac zho, sac racladzd naa tilnie naa zho!

<sup>3</sup>Nli miechse nac no, per ib zionald no gacndaan no zigne racndaan grëraa miech guidzliu. <sup>4</sup>Sac tel no, choot rnalod grë guiib las ne rnalo zho, sinque laa no rnalo poder ro ne rap Dios; mincosi zrieelo gnitlo grëtaa guieIntseeb ne racladz mendox gac. <sup>5</sup>Con poder rii, zrieelo csioog no ro zha ne squitaa lega rnee, zha ne racndaan nëd zho gacnan miech cho nac Dios. Grë zha ne racntseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús. <sup>6</sup>Ni poder co yquiiin no gnee no lo to lozh guien to gban to zigne racladz Jesús; lozh ga, grëragaa zha ne racntseeb, lëëquew yquiiin no par gacnan zho ganle zha rieguial gac zho.

<sup>7</sup>Zha ne rnee i loxaque rzedz yan naa, laglaase ga ran zho, nand zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guien zho ganle cho nac naa. <sup>8</sup>Nana no to guiab guieInsiatsle nu, sac rlu naa ne naa rnabey lo to. Per nacda guieInsiats, ible Dios bzo naa gnabey naa lo to, ni laa me bzo naa par glu naa zha tsienal to grë mine rnabey me, bzod me naa par yquidiee naa to tsienal to nëz ne nitlo to.

<sup>9</sup>Golgacnan sca ganle Dios bzo naa, guiabde to togo lega rnese naa par ctseb naa to. <sup>10</sup>Sac nanle naa no zha ne rnee i: “Gonde to mine rnee men qui. Loxaque lo guits ne rxeel me squitaa ndox rzë xtiidz me, per loxaque diidza. ¡Zeene zo me lo ne, tib zha yozhsew, per ni riend me zha gnee me!” <sup>11</sup>Per led scada gon. Niina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

<sup>12</sup>Ib guiabde to, togo ye naa quiayun zigne run zha qui, lëëque lëë zho runniats zho. Tib guieInxen ga, sac gon lëëque zha runnon zho. <sup>13</sup>¡Tel no, choot rdziuunniatsd no ncuane ni nacd no! Ni zeene rnee no cho nac no, per mine bzo Dios no nodziuun no min co rnee no; ni mecxe waa bzo no quiaseed no to.

<sup>14</sup>Ible riogual ne no gnabey lo to, sac gon no gloopaa biaad i biadseed no to zha nac Xtiidz Ndzon Jesús; choot noziaabd zaatne rioguald no. <sup>15</sup>Stiba, rdziladzd no gdaannie no xtsiin stib miech. Laa no bii cseed to lozh tsoguic to zha nac Xtiidz Dios, zeena haxta yele to gun xyudar no ygaazraa Xtiidz me. <sup>16</sup>Dzigosi nagon laa no guio grëraa guiedz ne ndxie dib nëz qui, guioseed no zho gacnan zho zha laa zho lo dol; per zig rneque naa ga, guiosiaabd no zaatne psilole stib zho, zeena gan miech ganle rdaannied no xtsiin stib zho.

<sup>17</sup>Znu ziaad lo Xtiidz Dios, zaatne rnee: “Zha ne zienie guic xoobnen læ zho por dziin ne run zho, mazd tsoxco zho xoobnen læ Dios.” <sup>18</sup>Sac paat rquiinda ne læëque ne gunnon ne, mine mazdraa rquiin nacne Dioszhal glu zha non nac ne.

### Nlid Dios pxeel zha qui

**11** Laa naa rnab lo to, jgolxecw yquiaadiag to mine gne naa nu, niicle tel no mine rzac to rquiind! <sup>2</sup>Golgacnan ganle, zigne rzac Dios to scaque rzaac naa to, ib racladzd naa cho guiaadquidie to. Mine racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleynie zho, haxta rdziñ dze ne rtsieelnia zho. <sup>3</sup>Sca none grieequia to lo me; per rdzieeb naa gon nend zha yguib mendox yquuil ma to, gondraa to mine rnabey Dios, dzigo laa to gac zig rac grëraa miech ndzinlid. Sac gon tel Ev, sca pquuil ma Ev.

<sup>4</sup>Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetgaa zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. <sup>5</sup>Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho ganle peet riend zho. <sup>6</sup>Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni ziyanlegaa tow ganle.

<sup>7</sup>Rzaac naa læda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina. <sup>8</sup>To riegual needz ncuaane nquiin naa, na lel grë zha ne nole xnëz Jesús len dze co, zha co pxeel ncuaane pquiin naa, rrieequia bla naa xtimi zho ga.

<sup>9</sup>Niicle bdziñ dze ne peet guienndraa lo naa, per ni tib lo to ib psodziind naa; læëtaque len dze co biaad bla zha bets ne zha ne ziaad nëz Macedon, zha co biaadnie ncuaane pquiin naa. Ib peet bnabd naa lo to hor co, ni gdzindgaa dze ne pe gnab naa.

<sup>10</sup>Golgacnan ganle, ib tedsod sodiidz naa grë min rii dib nëz Gres i. (Ible zun naaw, led yed naa rquidie, sac gon runbey naa zha nac Xtiidz Jesús.) <sup>11</sup>Per guiabde to togo rlëenie naa to, racladz naa csan naa to guielto; sac Dios zobwi ganle rleynie naa to. <sup>12</sup>Led scada, sinque laa naa gun min co zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiadziun now. <sup>13</sup>Sangue no, ndion no nlid Dios pxeel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

<sup>14</sup>Ni led ncuaane gzeed zdoo ne ga. Sac ible sca run mendox, no hor rzëeb ma rded ma zig tib xmandad Dios. <sup>15</sup>Gacxe waa, jzha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per zdziñ dze ne laa zho ygaa guielnë dox ne tsiegual zho, zaatne tsietizh zho grëta mine noyun zho i.

### Blactaa ncuaaṅe zadeed naa

<sup>16</sup>Laa naa rnab lo to nu stib, goḷquiaadiag miṅe gne naa, niicle teḷ rzë xtidz naa zig rzë xtiidz zha ne rzhinḷe guic. Nli lega niats gne naa, per goḷxecw gon tow, sac laa naa gunnon naa zig ruṅ grë zha qui. <sup>17</sup>Led Jesúsḍ rnabey znu gne naa, sinque masaque laa naa guṅ miṅ rii, zig ruṅ tib zha ne riotsle guic. <sup>18</sup>Teḷ squitaa niats rac zha qui lëëque lëë zho runnon zho, lozhd gooḷ zho lo to dien pe nac ncuaaṅe noyūṅ zho; goḷquiaadiaggaa miṅe gne naa nu na ganḷe:

<sup>19</sup>Conque rzac to name nixbiini to, ¿zha nac dzigo rdeed to diidz rquiaadiag to ncuaaṅe rnee grë zha yozh qui? <sup>20</sup>¿Pe ib riende to ganḷe quianabeyzhoole zho to i, quiasacsi zho to, quiaquidie zho to, quiala zho grë ncuaaṅe rap to, quiasanwin zho to, ya zig zgap zho lo to? <sup>21</sup>¡Haxta rtoladz naa gon, sac laa ne naa squi nabey to leḷ zhale squitaa no!

Grë ncuaaṅe riats zho i nac zho, ye naa zrieelo sca gunniats naa naa (znu nagon rac zha ne rzhinḷe guic). <sup>22</sup>¿Teḷne riats zho rnee zho zha Israel nac zho? Yecxe naa waa zha Israel nac naa. ¿Teḷne rnee zho lo dii ne bzooblo Dios ga ziaad zho? Ye naa lo dii co ziaḷ naa. ¿Teḷne rnee zho Abraham nac xmengol zho? Men cocxe waa nac xmengol naa. <sup>23</sup>¿Teḷne niats rac zho rnee zho xtsiin Jesús quiayūṅ zho? Gacnan zho ganḷe, naasi xtsiinḷpaa me quiayūṅ naa.

Nroob dziin ne ziyūṅ naa, blactaa ncuaaṅe zadeed naa, pe zhidaa zigo miech naa ladzguiib, blactaa zineedz dooguid zho naa, blactaa zaatne zadedlaa naa lo guieḷgut. <sup>24</sup>Gaayle vuelz zisacsi zhiwxtis zha Israel naa, galḷptsibguieega nia dooguid bneedz zho naa. <sup>25</sup>Tsonḷe vuelz zineedzyag zho naa, stib vuelz bneedzquie zho naa. Tsonḷe vuelz zadzieelo naa rdedquie barcw ne no naa lenḷe nisdoo; tib vuelz, tib dze tib guieel bzhoobse naa lo nisdoo. <sup>26</sup>Pa lotaa grë dan ne ziya naa. Nzian vuelz ne bdedlaa naa niet naa: zaatne bdedlaa naa lo nis guiebee, zaatne bdedlaa naa lo ngbaan, zaatne bdedlaa naa lo grë menḷe zit, zaatne bdedlaa naa lo grë menḷadz naa. Ziyoxtseeb naa lo guieḷgut, zigtaa zaatne nac lenḷe guiedza, zaatne nac dana, zaatne nac lo nisdoo, zigtagaa lo grë zha ne laglaase rquiaalo riladz Jesúsaa.

<sup>27</sup>Blactaa rdib rdzaag naa ruṅ naa dziin, blactaa guieel ni niip raaguiess naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guieṅḷ lar ne piix naa. <sup>28</sup>Ni zhaaque tibaque nonie guic naa dienḷe yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios.

<sup>29</sup>Zeene ron naa cho tib to racladz guiaanḷe zdo, mban rac naa zeene rrieelod gane naa lo zho; zeene rongaa naa cho tib to quiayūṅḷtal xtolḷe stib zho, ni rrieelod galisqui naaw lo zho, scaque mban rac zdo naa.

<sup>30</sup>Grë miṅe bne naa nu, nacda guieḷniats; teḷne rieguialḷpaa gunniats naa naa, mazd gzet naa grë miṅe rlu ganḷe peet gacd guṅ naa naase. <sup>31-33</sup>Zig bzhaac naa tib vuelz zeene bia naa Damasc, lenḷe dze co zob tib gobernador nac dziin lo rey Aret. Bnabey gobernador co xmenguiib me pquiānap zho gzase puert ne rap biedz nroob ne ndze igo ro guiedz co; nanḷe me naaz zho naa ngo zho

naa ladzguiib. Per brieelod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chiquid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac PxoZ Jesús, men ne rieguiäl dziuunnon ne gzataa dze, me zobwi ganle diidzli rne naa.

### Racniatsd Pabl

**12** Nanle naa nonguielda lëëque ne gunniats ne, per laa naa sodiidz lo to ganle zha nac grë ncuane zinabey Dios zilulo lo naa, ni grëgaa mine zinee me lo naa.

<sup>2-3</sup>Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiespírituse naa ye güeynie me; loxaque mese nand dien zha güeynie me naa. Loxaque mine bien naa ne laa naa bia lugar ndzon co, <sup>4</sup>ga bin naa grë diidz ndzon ne wлтаа gard gon miech, ncuane guiend zho zha naca, ni nodgaa diidzbey gne naaw.

<sup>5</sup>Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grë mine rlu ganle peet gacd gun naa naase. <sup>6</sup>Ni tel gacladzga naa gunniats naa naa por mine blozh bzet naa nu, led guelxend ga gun naa; sac mine nlipaa goca. Per rund naa min co, sac laa naa racladz tozhal guien cho nac naa, benque ran to ganle zha mban naa, rangaa to zha rne naa.

<sup>7</sup>Ne nligaa ndzondoo nac grë ncuane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa. <sup>8</sup>Tsonle vuelt zinab naa lo Dios ctiche me yoob rii; <sup>9</sup>biontaa vuelt në me lo naa: “Bui ganle laa naa nacniele luu, ni min co nac mine rquira naa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacnie zho.”

Min co nagon rley naa, sac ne znu nsis rac naa, grëse miech zeene ran zho grëtaa ncuane rrieelo run naa, rien zho nli Jesús nacnie naa. <sup>10</sup>Ne nligaa rley naa, sac niicle ne miech gzhe gzhele rac naa, niicle nroob guienë ne nodeed naa, niicle rbidzgo miech lo naa, rtsidil zho naa, no hor guiend pe yquiu naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacnie naa.

<sup>11</sup>¡Nligaa lega guelxenle nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa mine noyun to.

Nli nacd naa cho zha non, per tsod ncuane csanwin grë zha qui naa, niicle ne squitaa rzac zho zha rien nac zho, niicle ne rnee zho Dios pxeel zho.

<sup>12</sup>Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuane bneedz Dios diidz blu naa lo

to, blactaa grë milagr, blactaa grë ncuaañe bzee zdoo to gon̄ to. Biod dze ne nieednie naa to. <sup>13</sup>Lëëse miñe beñd naa lo to i, nacne nab naa needz to pe nquiin naa; sac grëraa zaatne ziyaseed naa miech, zha rneedz ncuaañe rquiin naa. ¡Golgun̄ dispensar tel̄ne rbiñladz guic to miñ co!

### Nonie zha Corint guic Pabl

<sup>14</sup>Laa naa nozhixcuaale par guialgan̄ naa to stib. Nu gac tson̄ vuilt guial naa lo to i; ni scaquegaa niina gon̄ ib csodziind naa lo to. Sac tel̄ naa, noguibd naa dien̄ pe gneedz to lo naa, sinque to guialguib naa. Golguien̄ gan̄le, niicle ne racladzde to, per rrieequia gon̄ mëed nac to lo naa; ni ndion̄ ne gan̄le, led mëete riegual̄ gdeed ncuaañe yquiin dad, sinque dad none gdeed ncuaañe yquiin mëed.

<sup>15</sup>Ne nligaa, tib guielbleya lo naa quieteedlo naa to, laa naa noxco guien̄ to zaacse gban to, zeena gdziñ to zaatne gneedz Dios cuëz to. Xco co no naa, ib rquiad zdoo naa lozh grë ncuaañe rap naa, o lozhgaa naa lo xco co; maase niicle squi zootne laa ne rleynieraa naa to, lel̄ nozozit to lo naa.

<sup>16</sup>Nan̄le naa, no bla zha ne rnee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne rien̄d ne quiaban me ne.” <sup>17</sup>Nana, zig nac zha ne zixel̄ naa ziyaadgan̄ to i, ¿pe niacxe biaadban zho to? ¿Pe niacxe biaadquidie zho to? <sup>18</sup>Naa quia bnab naa favor lo Tit biaad me i, ni pxel̄ naa stib zha bets ne biaadgrop me. ¿Pe no pe bnab zho lo to? Golgacnan̄ gan̄le, nodziuuñd no miñ co, sac zigtaa naaw, zigtagaa mew, dib zdoo no nodziuuñ no dziin rii, choot noquidied miech.

<sup>19</sup>Nana gza zdoo to guiab to bod parne guiaanwen no lo to, gane znu rne naa. Dios zobwi gan̄le led scada. Bets, bzian, grë miñe none naa lo to nu, laaw rne naa sacne racladz naa lozh tsoguic to gban to zigne nac Xtiidz Dios. <sup>20</sup>Sac gon̄, rdziladzd naa tel̄ne glanso naa lo to i, ni gan̄ naa racde to zigne racladz naa; dzigo niicle togaaw, tsod zdoo to zeene gan̄ to laa naa glisquiw. Adel̄ gon̄ zeene laa naa glanso i, lel̄ dil̄ no to; zha ne në rac zdoo dien̄ cho stib noded, zha ne nozhixcuaa diidzguizh, zha ne quianeenë, zha ne quiyacniats; nend haxta chop tson̄ diile nac to.

<sup>21</sup>Tel̄ gan̄ naa sca rac to, mbe gon̄ stoladznie naa to ni haxta siaabguielnë to naa; sac nan̄le naa ni lalnu rdziladzd Dios grë miñ co. Zig nac grë zha ne squi padzeelale quiyun̄ctal xtol̄ ni rsaand zho grëtaa guielyozh, grëtaa ncuaañe ndzinlid ne bii quiyun̄ zho, mbe gon̄ sigoon zho naa.

### Rso Pabl diidz

**13** Niina nagon̄ ne gac tson̄ vuilt guialgan̄ naa to, tel̄ pe nactaa falt ne cho quiyun̄ i, guiaan̄da scase. Zigne rnee lo Xtiidz Dios: Tel̄ no chop zho, tson̄gaa zha ne nan̄paa zha nac falt co, zha ne beena ga ib none laa zho quizh xfalt zho. Nu rac bion̄ vuilt ne rso naa diidz rii lo to. <sup>2</sup>Laaw nile naa lo to lultm vuilt ne bialgan̄ naa to, ni niina laaw rneque naa stib: Grëse zha ne quiyun̄ctal xtol̄ i, zigtaa zha ne padzeelale squi no, zigtagaa zha ne wriin



psilow, gacnan zho ganle zeene laa naa glanso i, grëse minë quiayun zho ib tedlaad zho, laa naa gunquizh zhow zigne rieguial zho.

<sup>3</sup>Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. <sup>4</sup>Nli nguudz goc me bdeed me diidz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zgaa no tib guielmban ndzon, sacne me nacie no; ni zrieelo gnabey no to, sacne rdziaap no xpoder me.

<sup>5</sup>Nana sca, tozhal golcobey dien zha mban to. Wen wen golcobey dien pe nli dib zdoo to rililadz to Jesús. ¿Pe nli mban to zig none gban zha ne rililadz me? ¿Pe zig zie dze rienraa to ne me nacie to, me rnabey lo to? ¿Te loxaque diidzse ye nac ne laa to rililadz me? <sup>6</sup>Sangue no gon, wen wen ndion no zha mban no, ndionpaa no ne lo Jesús ngab no.

<sup>7</sup>Tibaque rnab no lo Dios cxobnia me guic to zaacse gban to. Ni guiabde to togo par guiannziuu no lo miech gane noxcopaa no zaacse gac to; sinque laa no rdziuuna parne gban to zigne rieguial gban zha ne nli no xnëz Dios. Min co nagon noxco no, niicle tel rzac to lëda nu quiadziuu no. <sup>8</sup>Sac tel no, laa no zional gac to miech wen, zha ne zienal minë nac diidzli; choot ziaate par lega gactox no lo to.

<sup>9</sup>Gacxe waa, tib guielbley nroob ga lo no, telne zhal to znuse xixcuua to, gac to zha ne nlipaa dib zdoo rleynie Dios; laa ne yquiambëz to guiaadlisqui no grë ncuane noyun to. Laa no racladz gdzin dze ne gac to zigne rdziladz Dios, ni mincogaa quianab no lo me.

<sup>10</sup>Laa naa rso diidz rii lo to lo guits ne rxel naa nu, sacne racladzd naa gactox naa lo to zeene laa naa glanso i. Nli Dios bzo naa rnabey naa lo to, ni minë racladzpaa naa nacne lozh tsoguic to zhiwseed me; ib racladzd naa yquiaago naa to.

<sup>11</sup>Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, golchoobladz zdoo zho; ine niowse golban, tipse golgac. Scagaa Dios zleynie me to, ni haxta zacnie me to zeena peet ctsebde to.

<sup>12-13</sup>Nana sca, tib tib zha ne nacgrë to golquiaabdiuzh zho, ine golxen nia zho. Grëse zha bets ne, zha bzian ne, zha ne rililadz Jesús nëz rii; laa zho rxeel bdiuzh lo to. Golcaania zhibdiuzh zho.

<sup>14</sup>Dios sca guiaannie to! Ine nley golgac, golgan ganle pa lotaa rleynie me to. Peet tsienied guic to, Jesús nac men ne noxco grë zhizhgab to; ni scagaa Espiritu Sant gacnieu to tibaque tipse gac to. *Pabl*